



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



TAPAK 8

Russia-i Kyiv amak, Donetsk nung kanga sashia rarar

Fabregas asaya nungi anenba sangdongogo



VOL. XX NO. 260 (ADOK 260)

DIMAPUR TENTONÜ (MONDAY)

CHITENI (JULY) 03, 2023

₹ 5.00

ENPO-i Frontier Naga Territory atema Sumi nunger den senden amentsü

Dimapur, July 2, 2023

(Agencies): Eastern Nagaland People's Organisation (ENPO)-i Kiphire aser Shamator district tem nung aliba Sumi nunger den külem senden ka amentsü aokogo.

Eastern Districts Autonomous Council nung Sumi nunger adentsü, madentsü onük jembitepsü atema iba senden ayonger.

Sendenji July 4, 2023 anepdang 10:00 ako nungi Hotel Saramati, Dimapur nung amentsü ta osang angazüker.

"Kiphire aser Shamator district tem nung aliba Sumi nunger inclusion/ exclusion dak sendakba nung YTC, USLP, TTC aser ESH indang ENPO Sub Committee ajanga lemtet agiba atema June 30, 2023 nü Dimapur nung ENPO sanen luden senden ka menogo" ta ENPO sangdong ka nung

metetdaksü.

Senden nung Sumi nunger Frontier Naga Territory (FNT) maparen nung dendaktsüsü bangjemtep. Iba dak sendakba nung Eastern Sumi Hoho den külem senden ka amentsü jateper, ta ENPO-isa ashi.

Külen, Centre sorkari Eastern Nagaland district 6 atema autonomous council ka tentettsü ashiba pelashishia agizüker ta ENPO-i metetdaksüogo.

ENPO nung Chang, Khiamniungan, Konyak, Phom, Sangtam, Tikhir aser Yimkhiung kintem lir aser parnoki 2010 nungi state balaka tentettsü takhangba agüja arur.

Centre-i tawa tu Frontier Naga Territory tentettsü shidangogo aser iba nung legislative, executive, administrative aser financial autonomy dena lir.

Central Nagaland Tribes Council-i UCC magizüker



Dimapur, July 2, 2023 (TYO):

Nagaland nung Ao, Lotha aser Sumi nunger tongti telok Central Nagaland Tribes Council (CNTC)-i 22nd Law Commission dang Uniform Civil Code (UCC) magizüker metetdaksüogo.

India ya 'Unity in Diversity' nung amendaka lir aser ibaji Constitution of India ajanga kümzüka ayur anungji UCC ya iba tangatetba anema lir, ta CNTC-i ashi.

"July 26, 1960 nü India sorkar aser Naga People's Convention (NPC) tsüingda sign sütepa '16 Point Agreement' nung ajemdaker Arlla 371A latet. Iba ajanga

Nagaland-i Indian Union nung sendakteper aser ozüing kari dang iba Arlla nung lateta aliba onüktem agientsüra tesentaktep raksatsü. Tesüiba küm 60 tema nisungtemi ozü maitsü aser libaliro kümzüka ayutsü atema azü, asentzü, nüktzü endoka aser taküm bendanga agütsüba ajanga Nagaland aser India tsüingda tesentaktep yanglutetba liasü" ta CNTC-i sangdong ka nung ashi.

UCC mapa tenzüksü jembiba ajanga nübo agi tangar memenepba kintemi tsübutep aser iba nung Nagaland dena lir, kechiyong kin balala indang sobaliba, inyaksangshi aser

maparen balala lir, ta parnokisa ashi.

21st Law Commission-i 2018 küm Uniform Civil Code ya nungdak mali ta osang agüja lir. Iba melena parnoki tamangba yimsü shia nung family laws nung temelenshi kar asütsü metetdaksüogo ta CNTC-isa ashi.

"Constitution of India ajanga India nung nisung temeyoktep aliba agizüker anungji tang lateta aliba Uniform Civil Code ya India indang tangatetba anema lir" ta CNTC-isa 22nd Law Commission dang metetdaksüogo.

NFHRCC-i Foothill Road semdanga senzü

Dimapur, July 2, 2023 (TYO):

NFHRCC aser PWD(R&B) Divisional kettangsurtemi June 9-10, 2023 anogotem Foothill Road yangluba semdanga senzü.

Iba mapang Dimapur/Niuland Division aser Tizit Division nung DPRs specification nung lateta aliba ama mapa 100% inyakba angu. Ajisüaka Dimapur Division kübok Hovekhu Village leni aoba Tadi River nung medium bridge aser Wokha District arrtsü Kimpur River nung Slap culvert ka yangluba ajanga lenmang kanga junga sendakteptettsü ta NFHRCC-i sangdong ka nung ashi.

Chief Minister Neiphiu Rio lenisüba kübok Nagaland sorkari 2022-23 financial year nung Foothills road atema Rs.20 Crores lezmzüksüba atema tenüngsang agütsür. Bangdakpurtemi contractor balala nem sen magütsü aliba agütsüsü mepishir aser kasa mapang PWD(R&B) aanga ayongnu tila ana nung

bridge/culvert tekaraba nung yanglutsü mepishir, ta NFHRCC-isa ashi.

Tuli Division nung M/S W.Chingkam Phom & Co ajanga mapa inyaker aser taoba technical report nung mapa 75-89% inyakba shia liaka NOC maparen anendaka lir.

Tsudikong ajanga Anaki-C nungi Yajang-C tashi lenmang atema Bharatiya Janata Party(BJP), 21 Tuli Mandal Unit aser Tuli Joint Council Forum ajanga ken o kar benoka lir aser ibaji DPR nung lateta aliba ama repringshimtsü lir, ta NFHRCC-isa ashi.

Iba mapang NFHRCC Convenor Supu Jamir aser Co-convenor Hokiye Yepthomi nati anir kettangpurtem, PWD(R&B) Divisional kettangsurtem aser M/ S R.K.Construction (Dimapur/ Niuland Division) o M/S H.H Co. Construction & Supplier (Tizit Division) nungeri lenmang yangluba repringdanga liasü.

Maj. Gen. (Rtd.) Ang Mai-i NSCN-K chairman inyaksü

Dimapur, July 1, 2023

(Agencies): NSCN-K (YA) nungi razüka aoba NSCN-K telok tasen nung Chairman inyaksü atema Maj. Gen. (Rtd.) Ang Mai shimogo.

Ang Mai ya Tangshang Region nungi lir, ta GSO-1 (D), Naga Army, NSCN/GPRN Maj. Gen. Langnyei Konyak-i metetdaksü.

June 27, 2023 nü Naga Army indang General Head Quarter nung civil aser military officers

rondak senden ka amendang nisung ajaki mulunga chairman tasen shim, ta Gen. Langnyei-i ashi.

Arishi küm 50 tain Maj. Gen. (Rtd.) Ang Mai ya asür S.S.

Yung Aung-i anti-national aser anti-party maparen inyaka aruba atema chairman nungi anentsüba sülen April 10, 2023 nungi Naga Army-i NSCN/GPRN sorkar kettangsüa aru, ta Maj. Gen. Langnyei-isa sangdong nung metetdaksü. m

Asen lennir tulu asür S.S. Khaplang tsüingsü sülen anidaka Naga nüjiso atema rara nung Naga nungertemi Maj. Gen. (Rtd.) Ang Mai lenisüba den yaritepsü mepishir, ta GSO-isa ashi.

Manipur nung nisung 4 tepset; Kuki teloktemi highway lapoktsür

Guwahati, July 2, 2023

(Agencies): Kuki nunger teloktemi Manipur kübok Kangpokpi district nung ita ana tashi national highway mokdanga ariba lapoktsütsü ta Deobarnü osang metetdaksü.

Ajisüaka, Manipur nung ozüing alema mapa inyakba manener aser Deobarnü nisung pezü tashi tepsetba osang angazüker.

May 3, 2023 nü Manipur nung rara adokba sülen Imphal-i Nagaland kübok Dimapur den sendaktepba National Highway-2 mokdanga liasü.

June ita tetenzüklen Union Home Minister Amit Shah-i Manipur semdangba sülen iba mokdang ya khen atema agiena liasü ajisüaka June 9 nü Kangpokpi district nung Kuki-Zomi nunger nisung 3 tepsetba sülen lenmang mokdangtsü tenzüker.

United People's Front aser Kuki National Organisation-i Civil Society Organisations, yimtsüing, lanur aser tetsür lennirtem den aiben ajurutepa jembitepba sülen mokdang agientsü telemetba agia liasü.

Union Home Minister Amit Shah-i Manipur nung yimjung aser teputep bener arutsü ashiba onoki süoki ia bilemer ta UPF aser KNO külem sangdong ka nung ashi.

Kuki Zo teloktemi nübertem

timtemba ajema kümdaktsüsü aser essential supplies angutsü atema lenmang mokdangba agientsü lemtet ta parnokisa ashi.

Manipur nung tenem aser lenden arrtsü tesem balala nung central forces mapa lezmzüksüba atema tenüngsang agütsür. Tesem ajak nung central forces mapa lezmzüksüba sülen onok volunteers agientsü ta UPF aser KNO-isa metetdaksü.

Manipur nung yimjung meimba teloktem aser sensotemi inyaksangshi melenshir yimjung aser putepa alitsü tensa arutsü atema yaritepsü mepishir, ta parnokisa ashi.

Yashi nikongdang Chief Minister Biren Singh-ia Kuki nunger den yimjung aser putepshitsü atema jembio go ta shia liasü.

"Ni telephone agi Kuki nunger adianu kar den jembio go aser kechi atalokogo joko ojang ta ashi. Tang asenoki tatok agütsüteper amadoktsüla, aser putepshir külemi liyonga aotsüla ta ni parnok dang ashi" ta CM Biren-isa metetdaksü.

Ajisüaka, Deobarnü Churachandpur district nung David Thiek ta ser nisung ka tekolak atang. Iba lendong ya Langza ta ajaba Hmar-Kuki yimtsüing nung atalok.

Deobarnep züingia nisung kari yim amak aser idangji yimdaklir aika yim toktsür jena ao saka

village volunteers yimtsüing nüka ata. Thiek ya volunteer ka liasüaser pa tepset.

"Parnoki anepdang 3:00-4:00 ako meta yimtsüing nung mi senoktsü. Onok dang Hmar chief-i tongtipang documents bener yim toktsür aotsü ashi. Ajisüaka onok kidang nungi auya bener meyoktsü atema lanur ishika yim nüka toktsü" ta yimdaklir kati ashi.

Külen, Bishnupur district kübok Khoijumantabi nunga Meitei nunger asem khaset. Parnokji Ningombam Ibocha (34), Naorem Rajkumar (26) aser Haobam Ibocha (44) nunger ta jangjaogo.

Yasüing ayaterm nung tenemlen nungi nisung kari village volunteers dak injang khaloktsü. Parnok ya Khoijumantabi hills nung mapa lezmzüka liasü.

Iba lendong atalokba sülen Bishnupur district administration-i anepdang 5:00 ako nungi 10:00 ako tashi dang curfew alitsü mapang ajemogo.

Deobar anüingdang Chief Minister Biren-i Bishnupur nung lendong atalokba tesem semdanga liasü.

June 29 nungi tenem aser lenden tsüingda arrtsülen lendong balala nung nisung 6 tashi tepset. May 3, 2023 nungi tenzüker tang tashi nung nisung 137 tashi taküm samaogo.

Lt Col. Kalita-i K2K bike expedition tenzüksü



GOC-in-C, Eastern Command, Lt Gen R P Kalita ajanga Kohima nung aliba Assam Rifles Garrison nungi 2nd Naga Regiment indang Kargil Vijay Ride sentong Deobarnü tenzüksü dang tangokba noksa ka yangi angur.

Kohima, Chiteni/July 02 (TYO): 24 buba Kargil Vijay Diwas nungtem nung GOC-in-C, Eastern Command, Lt Gen R P Kalita ajanga Kohima nung aliba Assam Rifles Garrison nungi 2nd Naga Regiment indang Kargil Vijay Ride sentong Deobarnü tenzükja liasü.

Iba expedition ya 2IC of 2 Naga Regiment, Lt. Col Saini lenisüba kübok Mashkoh warriors 25 bike nung lir aser parnok ya Kohima nungi Kargil tashi state ti aser union territory ana ajanga kilometre 3700 jajatsü.

Parnoki iba mapang Kargil War mapang asürtem yimtsüng nungi ali bendentsü aser Drass

nung aliba Kargil War Memorial nung akhum agüja yutsütsü.

Kargil-i aodang parnoki nüburtem den ajurutepa linük yangerba nung Indian Army temi shilem agiba indang lemsateptsü aser lanurtem ajungmesotsü, Ex-servicemen aser Veer Naris temi metokmeperi angatsü, ta Lt Gen Kalita-i ashi, shiba Kumaon, Naga Regiment aser Kumaon Scouts nung Colonel lir.

Operation Vijay agir küm 25 ajungba bilemteta K2K motorcycle sentong ibai tongtipang ka lir, kong tasü tait Naga nung nokinketer temi asen linük north tsütsü arütsü nung par azü tenla asen tetsü tasoli wazüka ayu, ta GOC-in-

C ajanga ashi.

2 Naga Regiment yagi kanga tasü ita rara aser Kargil War takok angu, aser parnoki linük asoshi takum bendanga agütsüba benjongtsü asoshi ibai sentong ka lir, ta pai ashi.

"Iba yagi North Eastern Region aser tanünga linük sendakteptsü merangtsü aser Kargil War nung Nagaland nungi tasü tait sepaitemi shilem agiba indang awareness agütsütsü," ta pai ashi.

GOC-in-C ajanga Kargil War nung linük asoshi takum bendanga agütsür nem akhum agütsü aser iba tongpang raraba tesem nungi ali bener aruba asür kinungertem nem iba sentong nung agüja liasü.

BMSCH Kohima nung medical camp ayongzük



BMSCH, Kohima nung July 1, 2023 nü medical camp agidang tangokba noksa ka nung tongtipang nisungtem den ano dangartem angur.

Kohima, Chiteni/July 02 (TYO): IDEAL (IW) Charitable Society kübok annual medical camp ka July 1, 2023 nü Bright Morning Star Children Home (BMSCH), Kohima nung agia liasü.

Iba sentong nung shisalen sayur ya Dr. Zubenthung T Khuvung, M. O (Mobile Medical Unit) aser Ayangla, Counsellor, Mobile Integrated Counseling & Testing Centre (MICTC) liasü.

Dr. Zubenthung ajanga diet aser nutrition indang onük nung jembia liasü.

Nisung aikati nutrition deficiencies ya pungba-pungba agir, ajisüaka asenoki chiyongtsü shidak mechira aser

mekumdangra temang nung timtem balala adoktsü, ta pai ashi.

Ayangla ajanga HIV & AIDS awareness aser HIV AIDS menatepa aoba tera pezü indang lemsatepa liasü.

La ya MICTC nung shilem ka lir, aser par team yagi yimdak-yimtsüng aser meta talang nung aliba nüburtem nem angati medical camp ayongzüksür aser HIV aser Hepatitis amala atema azü tendanger.

Lai tanurtem dang kibong makum tashi shi nung memedemtsü ajungshia liasü.

Ano temesepba mozü achi-ajemba, needles lemsatepba ajanga item tashidak kanga

mela menatepa aor, ta lai ashi.

Iba formal session sülen BMSCH, Kohima nung aliba tanurtem ajanga aser anasa aliba tanurtem dak HIV aser Hepatitis tendanga liasü.

Alenuo Angani, Superintendent BMSCH ajanga iba sentong nung tepela o jembia aser Watisenla menden liasü, kong BMS tanurtemi temeja ken ka tena liasü.

Küm shia ayongzükba medical camp ya IDEAL (IW) Charitable Society mapa lir aser tajemzükba jenjang nung aliba aser tsürabor maliba tanurtem nem angati temang reprangtsü maongka agütsütsü nükjidong nung iba sentong ya ayongzük.

Samar aliba nisung tasü mang Wokha arem nung ngutet

Dimapur, Chiteni/July 02 (TYO): Samar aliba nisung ka tasü mang shirepa orr anünga aliba teret Wokha district kübok Aree yimtsüng nungi kilometre ka pilar June 30, 2023 nikongdang 3:30 meta ngutet. Iba nisungba ya Pangti Village nungi Ponathung Z Jami ta jangjaogo aser pa ya Pangti yimdak nungi June 2 nü sama aser tatensa New Aree Village nung lia angu.

Osang ajanga ashiba agi, iba tasü mang shirepa orr aliba ya Aree Village nungi nisung ana shikari aodang angu aser tenati

police aser yimdaklir nem osang agüja liasü.

Iba sülen police den kinunger tem iba tesemi ao aser yangji Pan card, Aadhaar Card, ATM card, Voter ID card amala nguteta liasü.

Iba tasü mang teret ya Honibarnep bener aru aser kinunger nem agüja liasü.

Iba nisungba asüba nung temolung malemstsüsa kecha mali, kechiaser parnoki pa samar bushiba mapang temolung melemtetsüsa kecha meliasü, ta police aser putu menden ajanga ashi.

Kiphire jila nung aliba helipad yanglushi tenzükogo



Dimapur, Chiteni/July 02 (TYO): District Administration aser Kiphire Town Baptist Lithro (KTBL) Church Construction Planning Committee lungjemer Kiphire Town nung aliba helipad yanglushi tenzükogo.

Iba helipad ya mejungi akumba ajanga Dimapur nungi Kiphire tsünga chopper service agütsüba anendaka liasü.

District administration ajanga SDO (C), Longdiba ketdangsüba kübok KTBL committee den lungjemer inyaker.

District administration yagi atsü aser entrance gate yanglur aser KTBL committee ajanga ali medema yangluba den cement plaster asür.

"Nüburtem tebilemstü khuret ajemtsütsü mechi akok tashi tekeraba nung iba mapa tembangtsü meranga onoki akokba agi tajungtiba nung inyaker. Mapang ka-ka nüburtem tasü-takum tsünga timtem bener alir, aser district nung teti chopper service maliba ajanga nüburtem teimla makai yutsür, anungji asen nübur nem iba amala service agütsütsü kanga tongtipang lir," ta SDO (C), Longdiba-i ashi.

Iba tesem nungya menügdakba mapa tamajung inyakba ajanga lokti tentet balalai khuret bena liasü.

Tang yangji atsü shidak atsüba, entrance yangluba aser chopper anenba tesem nung cement monokba ajanga item timtem majurutsü imlar.

Iba helipad ground ya renemba sülen tajungtiba nung amshitsü aser kuli tejanga makai iba tesemi nisung mashi aitsü memelatsü, ta Longdiba-i ashi.

District NST Department ajanga iba helipad ground ya tajungtiba nung ketdangsüa amshitsü imlar, kechiaser transportation services ya par küboki aiter aser yangji district administration ajanga yaritsü.

"Iba helipad ground yanglushiba nung district administration ajanga nungita yariba atema kanga pelar. Mapa tajung asoshi ano tali amteper inyatsü imla atar," ta T Yangpongse Sangtam, chairman, KTBL Church Construction Planning Committee ajanga ashi.

Kiphire indang Deputy Commissioner tasenba, John Tsulise Sangtam aruba sülen iba helipad ground yanglushiba maparen ya tenzükba liasü.



Nagaland Governor, La Ganesan-i July 2, 2023 nü Kisama Heritage Village nung aliba World War II Museum semdangba mapang tangokba noksa nung angur.

Maharashtra nung Ajit Pawar-i Deputy CM tenangzükba agi



July 02, 2023 nü Raj Bhavan nung NCP lenir, Ajit Pawar-i Maharashtra Angh tenangzükba agidang tangokba noksa nung angur.

Mumbai, July 02 (Agencies): Nationalist Congress Party (NCP) nung telesa adoka Amongnü NCP lenir, Ajit Pawar-i Maharashtra nung Deputy Chief Minister tenangzükba agi aser pai anisemba MLA 8-i minister tenangzükba agiogo.

2019 küm November ita nung Assembly election agiba sülen BJP o Shiv Sena tsüingda teloktep raksa aser anepdang yakta Raj Bhavan nung Devendra Fadnavis-i Chief Minister tenangzükba agi aser NCP lenir, Ajit Pawar-i Deputy CM tenangzükba agia liasü.

Iba sorkarji ghonda 80 dang liasü kechiyong Pawar-i party nung telesa madokdaksütet. Ita ka tsüingda Shiv Sena, NCP aser Congress party longjemer Maha Vikas Agahdi teloktep sorkar kuma Shiv Sena lenir Uddhav Thackeray-i CM tenangzükba agi aser NCP nungi meyipa arusang Ajit Pawar deputy CM liasü.

Yaküm June ita nung

minister Eknath Shinde leniba nung MLA 39-i Thackeray anema apusoba aser Shiv Sena nung telesa adoka MVA teloktep sorkar chirep.

June 30, 2022 nü Shinde-i CM tenangzükba agi aser Fadnavis deputy CM shima liasü. Maharashtra nung assembly elections sangküm October ita nung agitsü.

Nationalist Congress Party (NCP) tongti lenir, Sharad Pawar'er adianu jabaso, Ajit Pawar-i Maharashtra nung Eknath Shinde-i aniba sorkar nung adenba dak sendakba nung pai, "Iba ya tang tasen masü, ni shisa mebulur," ta metetdaksü.

Sharad Pawar-isa, July 6 nü pai party lenirtem senden ka ayongzükba liasü, ajisüaka iba anogoji matongdang party lenirtem kari tanga telemteba agi, ta metetdaksü.

Sharad Pawar-i, "Tanü tatalokba ya kar atemabo tasen asütsüa akok, saka ni atemabo tang tasen masü. 1980 küm

nungi ni aniba party nung MLA 58 liasü, iba sülen ajaki toktsü aser MLA 6 dang anüng, ajisüaka ni iba züngyaji timba kümdaksü aser party toktsürtemi parnok menden nung tamakok angu. Party toktsüba ajanga ni tebilemsü makar, saka parnok tarutsü tia atema tebilemsü katsür," ta ashi.

"Nisung aikati kü den phone ajanga jembidar. Congress Tir Mallikarjun Kharge, West Bengal CM Mamata Banerjee aser tangartemi kü den jembio. Tanü tatalokba atema ni shisa mebulur. Asüng ni YB Chavan temoatsü agitsü aser lokti senden ayongzükba agitsü," ta pai ashi.

Paisa, "NCP MLA tem aser lenirtemi senden mena tarutsü atema telemteba agitsü aser party anema apusortem anema inyaksü. Party Tir ka ama ni Praful Patel aser Sunil Tatkare na shim, saka parnoki pei teinyaksü shilem meinyak. Anungji ni parnok anema inyaksü," ta ashi.

Gujarat nung tzümetsüng lendong ataloktsüsa tensa ka nung lir

Ahmedabad, July 032 (Agencies): Gujarat tesem aika nung tzünglu maneni aruba ajanga tzümetsüng lendong ataloktsüsa tensa ka nung lir, ta ketdangsertem metetdaksü.

Tzümetsüng ajanga yimtsüng aika mobangogo aser gari lenmang mokdangogo; Valsad aser Navsari districts nung Amongnü anepdang tashi nung ghonda 24 dak tali tzünglu sashia aru, ta State Emergency

Operation Centre-i metetdaksü.

National & State Disaster Response Forces (NDRF aser SDRF) züngsemtemi tzümetsüng ajanga kongshiba nisungtem kümzükba maparen tenzükogo. Hokolbar nungi tenzükba tang tashi nung Jamnagar district nungbo tzünglu dak sendakba lendong balala nung nisung 11 süogo.

Ano külen tanga osang ka

nung, Union Home Minister Amit Shah-i, "Gujarat sorkari akokba tashi tzümetsüng agi kongshiba nüburtem yaridar," ta metetdaksü.

"NDRF aser SDRF teams den ketdangsertem tzümetsüng agi kongshiba tesemtem nung nüburtem yaridar. Iba ama tensa ka nung central aser state sorkar nüburtem den nokdaka lir," ta Shah-i twitter ajanga metetdaksü.

Tzüngluruwa mongpu nung Jharkhand nung süngdong crore 2.5 atemtsü

Ranchi, July 02 (Agencies): Tan tzüngluruwa mongpu nung Jharkhand nung süngdong crore 2.5 atemtsü aser arem tajungba wazüka ayutsü aser ali tajungba akümtsü atema mera balala agia inyaksü, ta Amongnü Forest Department nung tongti ketdangser kati metetdaksü.

India nunger li shilem 21.71 arem lir saka Jharkhand nungbo aremji ali square kilometer 23,721 lir aser ibaji state lushi shilem 30 shi lir.

Osangbener den jembidang Principal Chief Conservator of Forests (PCCF) aser Head of Forest Force (HoFF), Sanjay Srivastava-i, "Tang tzüngluruwa mongpu mapang nung onoki süngdong crore 2.5 atemtsü. State nung arem shilem tuluba akümtsü aser ali temo akettsü nükjidong nung onoki state tesem ajaklen 'Van Mahotsav' aser awareness sentongtem densema süngdong atemba sentong balala ayongzüksü," ta metetdaksü.

Ranchi yimti kija nunga süngdong lakh 1 atemtsü, ta pai metetdaksü.

"Iba dak alia onoki ayongküm nunga süngdong atemtsü. Ayongküm kilometer 110 nung süngdong atemtsü," ta Srivastava-i metetdaksü.

State nung tanem-tanemi arem shilem tuluba kümdar;

state nung arem square kilometer 110 shi renlokogo saka tongtibangtaji arem tajungtiba nung wazüka ayutsüla, ta pai ashi.

"Tawa arem renlokba square kilometer 110 bendenlokba lir, aser ibaji tepelatsü osang lir. Ajisüaka arem tajungba wazüka ayutsüji kanga tongtibang, kechiyong yimtsüngtem nung alirtemi parnok taküm alitsü atema arem nung metaloker. Iba dak alia arem nung merok mi aoba ya tebilemsü onük ka lir," ta paisa metetdaksü.

Ministry of Environment, Forest & Climate Change kübok Forest Survey of India (FSI), Dehradun-i 1987 küm nungi tenzükba küm ana shia khen arem lushi asadanger aser osangji India State of Forest Report (ISFR) nung adoktsür.

ISFR 2021 report ajanga ashiba agi, India nung arem square kilometer 7,13,789 lir aser ibaji linük lushi shilem 21.71 lir, ajisüaka Jharkhand nungbo arem lushiji shilem 30 jungnüa (29.76) lir.

ISFR 2019 aser ISFR 2021 tsüingda India nung arem lushi square kilometer 1,540 bendenlokogo aser iba nungji Jharkhand nung square kilometer 110 bendenlokba densema lir.

Bhim Army tongti, Chandra Shekhar Azad dak injang kahloktsür pezü puogo



July 02, 2023 nü Saharanpur (Uttar Pradesh) nung osangbenertem senden ka nung Police ketdangsertem jembidang tangokba noksa nung angur. Kasa noksa nungsa tawa Bhim Army tongti, Chandrashekhar Azad Ravan dak injang khaloktsür nisung pezü pua aliba noksa nung angur.

Ambala, July 02 (Agencies): Anogo ishika tejaklen Deoband (Uttar Pradesh) nung Bhim Army tongti, Chandra Shekhar Aazd dak injang khaloktsüba tatalokba dak sendakba nung Honibarnü Ambala (Haryana) nung nisung pezü puogo.

Ambala unit, Haryana Special Task Force aser Uttar Pradesh Police na senteper Ambala kübok Shahzadpur area nung nisung pezüji apu.

Parnok rongnung nisung asem- Vikas, Prashant aser Lovish nunger Uttar Pradesh kübok Saharanpur nungi lir aser Vikas bo Haryana kübok Karnal nungi lir.

Iba tatalokba maneni bushisüngdangtsü atema par pezüprongla UP police ket nung agütsüogo, ta Ambala STF unit DSP, Aman Kumar-i

metetdaksü. Bhim Army tongti dak injang khaloktsüba sülen Deoband police station nung ken o benoka liasü.

June 28 nikongdang Saharanpur district kübok Deoband nung Bhim Army tongti, Chandrashekhar sentong ka nung adenba sülen gari nung apusoba mapang prangpong amer telok kati pa meyong gari nung injang pezü khalokja liasü.

Injang kati pa teboklang yiruja Community Centre kati anir ao; iba sülen pa district hospital-i anir oa liasü.

Pa dak injang khaloktsürtemjia gari ka nung liasü, parnoki ajichilen nungi Azad mena aliba SUV gari nungji injang khaloktsü aser injang pezü nungjagi injang kati pa teboklang nung khashi.



July 02, 2023 nü New Delhi nung 'Online Course on Child Rights' tenzükba sentong nung Women & Child Development & Minority Affairs Union Minister, Smriti Irani adenba noksa nung angur. Kasa noksa nung Minister of State for Women and Child Development & AYUSH, Munjapara Mahendrabhai-a angur.



TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 03, 2023

Temeyong 5 kasa mesüet

Tang India nung BJP teloki aniba government-i India senso ajak asoshi senmangtsümang, sentsü-senlem, kibalembu, tsüka-oka aser senchimenchi dak aketba sobalibatem ajak kasa dang asütsü nükjidong nung 'Uniform Civil Code' ozüng yanglutsü tebilemba ka tatar hoho nung benoktsü aliba mapa ya peisasa pei teka nung aliba temeyong pungoprongla kasasa akümtsü bilemba aser merangba mapa ka amato lir. Atangji, nisungi inyakba mapa tilaba nungi tenzüker tuluba tashi nung temeyong pungo dang masü saka ter prongla liromedemtsü nungdaker. Iba jagi dang mapa ajak shitak aser takok ngua inyaktettsü. Ajisüaka, temeyong ter prongla liromedemtsü nungdakba o lokti nung shilem ka agitsüba atema khen liromedemtsü asoshi 'Uniform' agiba na tepila talangka itepba lir. Ibaji India government nung ato kilonser aser kilo kilonser nati anir yimsüsürtemi angatetra, kasasa (Uniformity) aser telongjem (Unity) na tsüngdaji angatettsü. Aji oda, kasasa-ji telongjem masü aser telongjemji kasasa alitsü atema masü. Kasasa yabo kasasa asürtem atema saka telongjem yabo kasasa masürtem atema lir. Anungji, India ama oshi-oben, külemküja, kibalembu, balalula, senmangtsümang aser sobaliba balala aika aliba purtem ya kasasabo mekümdaktsütettsü saka longjemabo litettsü. Iba nungdakji angatetba agi India yimten nüchiso ngur linük temzüng ozüng yanglurtemi India ya nübortemi mulungba yimten kübok tamangba yimsü aser sobaliba ajak sademsadema amangtsü aser beshitsü asoshi tamangba yimsü balala amanger aser sobaliba tapu balala beshir shia nem temeten aser nüchiso agütsü. Iba jagi Naga nung ama kenyongi India temulung nung alirtem den oshi, tamangba yimsü, achiajem aser sobalibaren shia nung balala purtem ajak nem parnoki jembiba oshi mesamadaktsü jembitsü, parnoki amanga aruba tamangba yimsü amangtsü aser parnok sobalibaren mesendoki akanga beshitsü atema talenba masü temeten agütsü. Iba telongjem, tangatetep aser tashi nung India küm 75 tesünep nung lia aruogo. Atangji, alima nung kecha teti atema akümba aser yangluba mali, nisung asür, yimtittem samar, tzüim agi tenem aser tenem agi tzüim akümer, yimten yimli ka wangshi-wangshia nokdaker aser kasa yimlji laodoker. Kasaji, joko India-a tamaren yimten yimli ka kümtetter küm 76 bubai aiyaoaker asünungji, tang India ajaklen ajak atema nübortem sobaliba aser libaliro temzüng ozüng ka dang (Uniform Civil Code) asütsü apusoba ya India nung tamangba yimsütem aser sobaliba tapu balala ser ka küma longjema aliba benjatsütsü tenzüker asütsü. Kechi kodaser tang Hindu, Muslim aser Khristan yimsü amangertem ajak atema kibalembutsü, balalulatsü aser senmangtsümangtsüba ozüng 'Uniform-sa' ka dang sütettsü ? Aji dang masü saka India nung Khristan-temsa süaka karbo tebur senmang saka ano karbo tetsür senmang lir ? Ano, tamangba yimsü nung, balaka, amongtsümong balala lir. Aji oda, Khristan-tem amongnü mapa meinyak anisüngzük agia Tsüngrem külema amonger. Kasaji Muslim nungertemi Hokolbar nü shia sarasadem sentep agir. Itemji kasa anogo ka dang kümdaktsür kechi koda Tsüngrem külema amongtsü ? Item tebilemstütemji yutsür tamangba yimsü kasa süaka Khristan aser Muslim nungertem rongnung dang masü saka Hindu nungertem rongnunga sobaliba balala lir. Ano, Hindu nungertembo kasa Hindu nungersa süaka kin tulu aser tila lir. Tang tashi tesem aika nung item kin tulu o tila na külemi tzübo ka nung tzü matar, külemi mener mechiyonger aser ki ka nung külemi malir. Aji oda, Hindu nungerto kin kidong shia mapa teinyaltsüa balala lir. Item ajakji teka nung temeyong pungo memedem ama saka temeyong ka mali nung pezüji timatamba amai lir. Ano temeyong pungopronglaji ka küma 'uniform-sa' yanglushidi asünungbo medemmedema alangdoktsüba dang asütsü. Ano, temeyong pungoprongla kasasa medemmedema kümdaktsü nungbo akhi ama mapa junga meinyaktettsü. Aji oda, temeyong pungoprongla kasasa asütsü mechi par pungoprongla azü yima alangdok nung jungdi ma ? Tanü lenir kari linük ka dang, anungji sobaliba ozüng (civil code)-a ka dang asünungang India telongjem tashi taitba akümtsü ta bilembaji, ano khen, jungjunga bilemdangshitsüla.

OLEMSABANG

TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

- Temsüyanger, CTC (source:- Mitkar)

(Yashi adok nungi)

Mosai ajangzükbatem aser pa taküm lenisüba kar:

- i. Nübur mulungjang nung Mosa dak temulung lemtettsüsa pai mapa taküm agi sayu. Yamaji tarutsü asoshi teimla nüburtem nem agütsü. Nüburtemi pa dak temulung alem. Khen khen nüburtemi pa dang nemnemaka parnoki pa sülen anidaktsü nongnanga maliasü (Ani. 15:24; 17:3).
- ii. Tenangzükba lima artsü matong tashi pai nüburtem ani. Pai nüburtem dang nangzükba ama pai atalokdaktsü. Lenmang nung timtem teokrong aika ajuruaka pai nüburtem dang nangzükba kodanga metoktsü (Tazüng. 5:1-2; 7:18; 8:2; 9:7),
- iii. Pai nüburtem lenmang nung ani, parnok yari, Tsüngrem aser nüburtem tsüngda pa odanger liasü. Tsüngrem nungi nüburtem pilaa pai meyok aser par Tsüngrem Yihova mamatsü asoshi teti nüburtem ajungshi (Ani.14:31). Pai parnok den jembiba, sayu, aser lendongtem parnok dang sayu. Nüburtem asoshi tatishitsü lenir ka pa liasü. Pa ochishir lenir ka liasü.
- iv. Mapa küma inyaktsü pai nüburtem dang sayu. Tejakleni nüburtem aotsü tejangraba aser parnok nükjidong ajangzüktsü asoshi pai teti nüburtem nongita teyari agütsü (Ani. 14:14; Tazüng. 1: 29-30).
- v. Pa mabensabatem aser abensabatem pai meteta liasü (Ani. 3:7-12; Ani. 4:1; Ani. 4:10).
- vi. Pa kanga ajemaluba taküm aser kanga khuret bentetba taküm ka liasü (Ani.4:12-14).
- vii. Kanga tenendak nisung, nükjidong matong tashi nentaka inyakba lenir taküm ka. Küm aika nüburtem azüngmeyakdak lenmang nung jajadang pa dak taochi agi sünga liasü (Ani. 14:14).
- viii. Tangar asoshi aria bilemba lenir ka liasü (Ani. 18:13-27).
- ix. Ajak nung pai Tsüngrem madang metaloka liasü. Tsüngrem Pa lenir aser teyariteper liasü (Tazüng. 31:7-8).

Melepzüng:

Mosa taküm aser mapatem nungi asenoki angateter; pa merumeru taküm ka masü, takokba mapa asoshi pai kodanga lenmang tatsüba nung mejaja, anungji pa ochishiba taküm takang ka liasü, aser pai tangar alema tua maangka kodanga mebushi aser pa asoshi kecha mebushi. Kodang nisung ka taküm nung iba ama sempet taküm tajung lidir pa/la temulungjang, tebangotem, aser inyaksangshi sütepsütepa alir. Kodang lenir kati yamaji tebang o aser mapa sütepsütepa lidir nüburtemi pa/la dak temulung alemer, aser kodang nüburtemi temulung lemdir pa/la chichiba lenir ka akümer. Nüburtemi temulung lemtetba lenir kaji chichiba lenir ka lir. Pei asoshi taginübatem aser mulungbatem alema lokti asoshi tajung bilema inyaktsü asoshi Mosa taküm ajanga sayur. Mosa taküm nungi maneni angazüker; lenir ka taküm nung tongtibangtiba taküm leniba kaji pa/lai pei jenjang metettsüla, aser pa/la taküm shisatsü akhümtsüba yamaji pei taküm nung litetta tangar dang sayutettsüla, kechiaser tatishitsü tajung aketba lenir tajung ka jagi pa/la jaklaliru aser mapa ajanga sayur. Lenir tajung ka jagi mangdang tajung shisateta iba jagi nüburtem jaklaliru melenshidaktsür. Lenir tajung ka jagi tarutsü asoshi mangdang tajung nguteta iba mangdang tajung tangar dak benloktsür. Lenir shibai tarutsü asoshi mangdang tajung angur pa/ lai pei taküm nung aser mapa nung timtem agitsü asoshi renema alir, aser pa/lai aibelentem nungi tangazükba tajung nguteter. Lenir tajung kati nüburtemi temulung lemtettsüsa taküm nung liteta sayur, teyariteper tajung nung tangar den tesendaktep tajung yanglur. Lokti telongjem mapa (team work) aser teyariteper pa/lai kanga senti süa agir. Pa/lai lokti nung tangatetbatem balala angatettsü meranger aser yamaji lokti nung tangar akümtsüba tangar den tesendaktep yanglur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

DABA nung 48 buba ABAM Youth Sunday lanur Inty sentep agi



July 02, 2023 ABAM Lanurtem Anogomung sentong nung Dimapur Ao Baptist Arogo lanurtemi DABA inti atenshidak tenla ki tuluba Duncan mepu nung shilem agiba ka noksa nung angur (TYO).

Dimapur, July 2, 2023 (TYO) : Deobar nikongdang 48 buba ABAM Youth Sunday lanur inty sentep Dimapur area asoshi DABA (Duncan) tenla kidang takok nung agiogo.

Iba sentong ya Dimapur Area Associate Pastor Youth Telongjem (DAAPYT) ajanga ayongzükba sentong ka liasü aser Arogo ajak agi 26 nungi

lanurtem 2,700 shiarua aten. Iba sentong nung tongti o jembir Rev. Sentisashi, Senior pastor (KABA) ajanga "Tsüngremer meyong nem" onük nunga jemdaker lanurtem ayongzük aser lanurtem asoshi Mr. Temsü Jamir, Tir Dimapur Area Ao Pastor Telongjem-i mejeta sarasadema liasü. Sentep tenzüka Mr.

Lanusunep Longchar, Tir DAAPYT-i ajak pela agizük. Arogo balalai pei dak aliba sempet tajungtiba agi sangro, ken, tsüngsang aser saya ajanga Tsüngrem kuli süa liasü. Associate Pastor Youth tem-i anir lanurtem ajaki shilem tajung agiba ajanga sentong kanga takok nung tembang.

France Tir-i linük tesem ajaklen Tenla kitem wazüka ayutsü nangzük

July 02, 2023: France Tir, Emmanuel Macron-i linük tesem ajaklen akhidang nungi aliba Tenla ki meyrjang aika wazüka ayutsü atema mera agia inyaksü, ta sangdongbaji France nung Arogotemi pelaa agizükogo.

French bishops' conference department for sacred art nung director, Gautier Mornas-i, "Tiri Tenla kitem wazüka ayutsü aser anepalutsüsü nangzükbaji bishops' conference-i kanga pelaa agizüker," ta metetdaksü.

Paisa, "France nung yimsü dak sendakba kiojen 100,000 shi lir, aser item rongnung Catholic Tenla ki 42,000 densema lir. France nung

yimsüngtem ajakji Tenla kitem meketa yanglu, anungji Tenla kitem anepaluba tetezü linük anepaluba lir," ta ashi.

June 5, 2023 nü Tir, Macron-i linük nung akhidang nungi aliba Tenla kitem wazüka ayutsü atema mapatong tasen aika sangdonga liasü.

Interview ka nung jembidang Mornas-i, "2019 küm April ita nung Paris nung aliba Notre Dame Tenla ki arongba sülen yimtenren tsütsü tayongzükba ajuruogo. 2022 küm July ita nung Senate report ajanga, iba Tenla ki anepalu mesüra bendoktsüa akok ta metetdakja liasü," ta ashi.

"Notre Dame Tenla ki arongba sülen küm ka tsüngda

sorkari linük nung akhidang nungi aliba Tenla ki 190 jenjang asadanga liasü," ta Mornas-i metetdaksü.

"Right-wing aser communist naprongla nungi senators-i item Tenla kitem wazüka ayutsü nüngdak ta bangjema liasü," ta paisa metetdaksü.

French Revolution 1789-1799 mapang raksaba Tenla kitem aser convents ajak linük meyong kiojen lir, ta 1905 küm church-state separation ozüng ajanga sangdonga liasü, anungji tekülem sentong agitsü atema Khristantem nem item Tenla ki amshidaktsüba den külemi item Tenla ki anepalua wazüka ayutsüji sorkar ketdangsertem mapa lir.

ANOGO ABEN TSÜNGREM DEN

Tenüngsang Agütsüba Teinyaktsü T.Ken 113:1-9

"Kibuba tenüng, iba mapang nungi aser teti tatem maka temoatsü süang. Anü dok nungi anü lu tashi Kibuba tenüng sanga alitsü" (t.2,3).

Item tekong yagi asenok teinyaktsü indang ashir. Mezüngbuba, asenoki Tsüngrem tenüng asangtsüla. Kodang asenoki Kibuba tenüng asangtsü amadokdir lendong lir ta metettang. Shibai anü adokba tobur tajung mesüra anü aiba tobur tajung, tebur tajung metsü tsüngküm anogo mesüra tobur tajung asükwa tsüngküm yanglu, Pa tenüng mesangi itemji pelaa agizüktsü? Asenoki Tsüngrem tenüng asangtsü tetemsü, kechiaser Pai asenok asoshi mapa tulu inyak.

Ano ken züluri anogo ajak nung Tsüngrem tenüng asangtsü ashir, "Anü dak nungi anü lu tashi Kibuba tenüng sanga alitsü" (t.3). Anepdang Pa tenüng sangang. Anogo süidang Pa tenüng sangang. Anüngdang mapa tajung asoshi aser mapa tasak asoshi Pa tenüng sangang. Tia ajak ajanga Pai na reprangba asoshi Pa tenüng sangang.

Asenoki ano alima ajunga nung Pa tenüng asangtsüla- anü adok nungi anü lu tashi jajaba ama. Aikati Kibuba memeteti alir, aikati Kibuba Yisu tekümtet mangatet lir. Parnok asoshi kechi inyaksü? Asenok alidak nungi kuli asüba ajanga tenzükdi. Asenoki sarasademdi aser agütsüdi. Missionarytem asen teyari nüngdaker. Tsüngremi osang bener Bendang limai na yoktsü akok. Tsüngrem tenüng sanga pei ataba mapa inyakdi.

Ne nem Pa tenüng asangtsü maongka agütsüba nung ne teinyaktsüa dena Tsüngremi ne nem agütsür. Iba kuli nungi na kodanga jena tuo. Nai Pa tenüng asangba agi anogo tepiyong aser alima ajunga süngdakjang. Na anogo shia jajaba nung Kibuba tenüng asangbaji shilem ka kümdaktsür asü ?

MP nung High Court-i Khristan school nokdangba jara agientsü tuyu



Madhya Pradesh kübok Damoh nung police-i jara agi St. John Senior Secondary School nokdanga aliba noksa nung angur.

July 02, 2023: Madhya Pradesh state nung High Court-i police ketdangsertem dang Khristan school lenmang jara agi nokdanga alibaji agienang, ta tetuyuba agütsü.

Madhya Pradesh kübok Damoh district nung June 22 nü police-i St John's Senior Secondary School-i aoba lenmang jara agi nokdanga

liasü. Police-i lenmangji parnok meyong, ta shia lenmang nokdangba sülen school ketdangsertemi High Court nem temepishiba ka agüja liasü.

Arogo lenirtemi, police-i school lenmang nokdangba ya Khristantem aser Khristan rejutem anema inyakba shilem rongnung ka lir, ta ashi.

June 28, 2023 nü High Court judge kati police-i inyakba mapaji ashishia, ibaji ajanga kaketshirtem takoksa angur, anungji ibaji tongtibangtiba südaksütsüla, ta ashi.

Khristan school nungji kaketshir 2,300 dak tema azünger. Iba ken o angadanga mapang nung High Court Justice, Sanjay Dwivedi-i,

"Kaketshirtem aser nüburtem ajangzüktsü nükjidong nung ni telangzüba agütsürtem dang kaketshirtem anogo 30 school jagi otettsü atema inyaksü tuyu," ta metetdaksü.

Paisa, school-ia iba liji parnok meyong, ta shia tim court nung ken o agüjang, aser iba mapang tashi school tanurtem school-i otettsüsa school nokdanga aliba jaraji agienang, ta tuyu.

"Kaketshirtem takoksa mangutsü atema iba tetuyuba ya tangsa mapa küma inyaksüla," ta High court-isa metetdaksü.

June 22 aonung police-i school tongti kikümbangleni aoba lenmangji jara metre 100 agi nokdang, ibayongji tasüngnü nungi kaketshirtem school telungi meiteter.

Anüngji tsüraburtem den jembitepba sülen school principal, Sister Sophy Bharat-i kaketshirtem atema online class tenzüka liasü.

Osangbener den jembidang Sophy Bharat-i, "Onok senzüba lenmang nokdangba jara agientsü atema court-i tuyuba atema onok kanga pelar. Iba ya public lenmang lir, anungji iba

lenmang nokdangtsü atema shinga dak-a temeden mali. High Court-i tuyuba ama onoki okadak maneni ken o benoka raratsü," ta metetdaksü.

Court nung ken o angadanga mapang nung school lawyer, Anshman Singh-i, iba lenmang nung school-i oli-aruli ta senzür ajaki jajar aser 1989 küm nungi ketdangsertem tsütsülen nungi timtem kecha magütsüi aru, ta ashi.

Paisa, iba lenmang ya sorkari yanglu aser school-i aoertem den nüngdak balala alir ajaki iba lenmang nung jajibaji shingaia mashishii aruogo, ta ashi.

"Ajisüaka ajungbena police ketdangsertemi gari lenmang liji police department meyong, ta shia school nokdang. Iba li ya public lenmang, anungji yamai nokdangtsü makok," ta paisa shisem.

Iba school ya 1988 küm lapoka liasü aser jila nung tsüraburtemi tanurtem kanga sapua yokba school tem rongnung densema lir.

Nütsüng million 72 aliba Madhya Pradesh state nung nütsüng shilem 0.29 dang Khristantem lir.

AO OSHI ANGAZÜKDAK: TANÜ ANGAZÜKTSÜBA OJANG



Remsa

(n) tashi aittsü atema teperem nung sü mesüba (waist belt, girdle)

* Yimer lanurtem ajak **remsa** zür arem lepyonga ao.

Remsep

(v) mi sepdaktsü (douse, put out fire)

* Ozübo teti mimong nung mi ajak **remsepa** yur mejanger.

OLONG PAITEP # 6564

Grid for OLONG PAITEP # 6564 with numbers 1-16 in various cells.

TIPIEN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3


OLONG PAITEP # 6563 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.



ALOKBA TEBU TENA ENGLISH MEANING JANGJATEPER :

- Alokba : Oba, tanü Misslai English agiba meaning kar mangateter aja.
Tabu : Kwa, Obalai merangdangtsü ato.
Alokba : "Confident" aser "confidential" ana ya ni peleptepa ayur ati.
Tebu : Ümmm, terabo tasak ako, saka temelaba angatetsü atema ni tatishitsü kar amshidi: Na ya kü jabaso, aji "confident," asen kidangser Polokba ya nenu, aji "confidential", angatetet südi? Aji nütsü dang mashitsü, ok?
Alokba : Ok dad!

- Lilir : WhatsApp

Happy Birthday

TENÜNG : TIAJEM OZUKUM
Tasobaanogo : 3rd July 2020
Küm : 3
School : First cry Intellitots Pre school
Talidak : Officer's Hill, Kohima
Tsüngremer tiajem nung jala arishi küm 3 tashi moatsü nung teyanglur tenüng asanger. Tsüngremer nükjidong alangzükteta litetba jala ka asütsü maneni arishi talang meshija sarasademtsür.

- Adi Asang, onü, tanubo & oko nungertem.



Sikkim Joint Action Council-i Uniform Civil Code magizüker

Gangtok, July 2, 2023 agütsütsü.

(Agencies): Sikkim nung Joint Action Council (JAC)-i Uniform Civil Code (UCC) anema sentong ka ayonga agiogo.

Iba symposium nung political party tem, shisashirtem, lawyers aser NGOs aden aser parnoki Sikkim nung UCC magizüker ta bangjemtep.

Linük temzüng nung Article 371 F aser Sikkim nung kin balala indang sobaliba ozüngtem nung ajemdaker UCC magizüksü ta parnoki lemtet.

Iba bangzüng ya Sikkim tarutsü atema kanga tongtipang lir aser Law Commission nem

Iba symposium nung ruling party nungi shinga maden aser parnok madenba atema JAC mepela. Ajisüaka parnoki Sikkim nung UCC magizüksü aser Article 371 F kübok state nem maitsü balaka agüja lir ta bangjemtep.

"Iba ya Sikkim tarutsü atema kanga tongtipang lir aser ruling party nungi shinga madenba atema jashir. Parnoki lemtet kecha magiaka olemtep nung adentsüla. Ajisüaka onoki bangzüng ka renemogo aser Law Commission dangi abentsü" ta JAC Vice President Pasang Sherpa-i ashi.

"Tang atemabo onoki UCC anema menokdaker mesüra pelashishia magizüker. 21st commission-ibo iba ya magizük anungji 22nd Law Commission-i iba draft koma yangludir onoki reprangdangtsü. Article 371 F ajanga Sikkim kümzüka ayuba asadanger ang onoki lemtet ka agitsü" ta Sikkim Bhutia Lepcha Apex Committee (SIBLAC) convenor Tseten Tashi Bhutia-ia ashi.

Law Commission-i Universal Civil Code (UCC) atema tebilembatem angadangtsü aser iba atema parnoki July 12, 2023 tashi mapang agüja lir.

AAP-i Arunachal assembly menden 60 & LS menden 2 nung tokteptsü

Itanagar, July 2, 2023


(Agencies): Arunachal Pradesh nung sangküm general elections agidang Aam Aadmi Party (AAP)-i assembly constituency 60 aser Lok Sabha menden 2 nung candidates toktepdaktsütsü tebilemba lir.

"2024 küm Arunachal Pradesh nung sorkar kümra onoki water, electricity aser Rs 10 lakh tashi medical facilities angati agütsütsü aser world class education sayutsü" ta AAP state unit general secretary Toko Nikam-i ashi.

AAP sorkar kümra ashishitep aketba Arunachal Pradesh Unlawful Activities (Prevention) Act (APUAPA) of 2014 aser Arunachal Pradesh Freedom of Religion Act of 1978 agientsü, ta pai metetdaktsü.

Yaküm Itanagar ghonda 72 mokdangba dak sendakba nung state sorkari APUAPA kübok nisung 40 dak tai tonglokja apuba atema nübertemi lungkak aita liasü.

Telok aikati state sorkar dang Act meyipa agitsü



takhangba agütsü. Iba Act ya Nabam Tuki-i aniba Congress sorkari 2014 küm yangluba liasü.

Arunachal Pradesh Freedom of Religion Act of 1978 nung nisung shinga tamangba yimsü memelentsü lateta lir.

AAP-i sorkar kümra ita trok tsüngda Arunachal Pradesh Public Service Commission (APPSC) ken o bentetsü aser ochimashi maparen samatsütsü atema Arunachal Pradesh State Service Selection Board agientsü, ta Nikam-isa ashi.

"AAP-i Gyamar Padang nüngtem nung 'Statue of Honesty' ka yanglutsü. APPSC paper temai adokba ken o ya

pai mezüng belenshi" ta paisa metetdaktsü.

AAP sorkari Capital Region nung world-class city road ka yanglutsü, department balala nung out-of-turn promotions noktangtsü aser district headquarters ajaki all-weather road connectivity yanglutsü ta Nikam-isa metetdaktsü.

AAP-i state nung Lokayukta mapa tenzüksü, Tomo Riba Institute of Health and Medical Sciences (TRIHMS) nung world-class medical facilities agütsütsü, tesüiba küm 12 nungi 20 tashi department balala nung casual labourers aser ALCs (Auxiliary Labour Corps) regularize sütsütsü, 'gaon burahs' itasen tutsütsü aser Assam Frontier (Administration of Justice) Regulation, 1945 den liromedema village council courts yanglutsü, ta paisa ashi.

AAP-isa 3rd aser 4th Arunachal Pradesh Armed Police Battalions lapoktsü aser iba ya lanurtem nem mapa agütsüba maongka ka asütsü, ta Nikam-isa ashi.

Assam Police-i BTR nung telungpur 7 apu



Nagaland aser West Bengal nung nisung 7 apu" ta GP Singh-i ashi.

Parnokji Dauharu Bodo (43), Amit Boro (39), Buddhiman Debbarma (45), Teron (23), Rengwna Brahma (34), Bhumsa Chandra Boro (23) aser Kajal Ray (42) nunger ta jangaago.

Taküm June ita tetenzüklen telungpur telok tasen kati Centre aser Assam state sorkartem dang parnok BTR nung inyaksangshir aser February 1, 2023 nungi 'Boroland' ta ser state balaka ka tentetsü takhangba agütsüba shidi ka zülua liasü.

Iba telungpur telok nung B Dwidengra (President), B Rwngrwa (Vice President), B Ankhilai (Army Chief) aser B Bwkhangsa (General Secretary) nunger lir.

Guwahati, July 2, 2023

(Agencies): Bodoland Territorial Region (BTR) nung Kamtapur Liberation Organisation (KLO) aser Boro Liberation Army (BLA) tenüng amer tashiyim agi sen saruba inyakyim ka makdokogo.

Assam Police-i iba dak

sendakba nung Assam, Nagaland aser West Bengal nungi nisung 7 tashi puogo, ta Director General of Police (DGP), GP Singh-i ashi.

"Assam Police-i BTR nung KLO aser BLA tenüng amer tashiyim agi sen saruba telok ka makdokogo. Assam,

Russia-i Kyiv amak, Donetsk nung kanga sashia rarar

Kyiv, Chiteni/July 02 (Agencies): Anogo 12 anisungzüka lir Russia-i yasung drone amshia Kyiv amak ta Ukrainian ketdangsur kati ashi aser defence systems ajanga itemji ajak amai samatsü.

"Tsükchir temi ano Kyiv amak. Tangbo asü-amaba mesüra teraksa agütsüba osang mali," ta Kyiv nung military administration tekolakba colonel general Serhiy Popko-i Deobarnep Telegram channel nung ashi.

Air defence system ajanga Kyiv nung 'targets' nung kongshiba ama ola angashiba Reuters news agency ajanga sangdonga liasü.

Anepdang 2:00 ako meta Ukraine yimtiba aser ano Ukraine tiyonglen aser anüdoklen tayimtsü amshia amakdang tekumdangtsü ola agütsüba ghonda ka shi angashi.

Tang tashi iba lendong dak sendakba osang tejangja mali.

Linük east aser south tsütsü Russia nungeri injang-bomb tesashi khaloktsüba mapang

civilian timba asü ta Ukraine ketdangsur temi sangdonger anogo ka lir iba osang ya angashir.

Linük anüdoklen front-line Donetsk region mimh Hokulbarnü aser Honibar aonung sangwa amakdang civilian asem tepset aser 17 yiru, ta Governor Pavlo Kyrylenko-i shia liasü.

Donetsk kübok tesem asem nung tanen makai kanga sashia rarar aser yangji Russian sepai jenti adenshia ali rakzüksü meranger, ta Ukrainian General Staff ajanga ashi. Bakmut, Lyman aser Marinka yimtitem nung kanga sashia rarar.

Ukraine south tsütsü Kherson region nung Hokulbarnü aser aonung sangwa amakdang tanur ka densema nisung pongu yiru, ta Governor Oleksandr Prokudin-i ashi.

Russian sepaitemi artillery, drone, mortar shell aser rocket amshia province nung 82 ben amak, koba frontline kilometer 1,500 agi ana sadanga lir aser Dnipro River tzünokdang

raksaba ajanga tzümetzung adokba agi tang tashi timtema lir.

Kasa mapang Ukraine northwest tsütsü Rivne nuclear power plant nung Tir Volodymyr Zelenskyy-i linük indang mitkar tashishir aser atomic energy ketdangsurtem den senden mena northern region nung tensa asadanga liasü.

Zelenskyy-i Rivne bushia oa yangji senden amenba ama pai aibenbo meinyakdang, kechiaser ibai raradak nungi takangka pilar lir.

Saka ibai Belarus arütsü anasa lir, kong Russia indang Wagner mercenaries tem oa alitsü tezüngzüktep yanglua lir.

Office of the AO SENDEN LITERATURE BOARD (ASLB)

MOKOKCHUNG - 798 601, NAGALAND
Reg. No.HOME / SRC-6703

Date: 01-07-2023

ASLB SANGDONG

Taoba Sangdong dated 22/06/2023 nung sangdongba ama Ao Senden Literature Board-i achaayanga agiba Arangtet Tatidang 2023 Chiteni 6-8 tsungda tekübok agüja aliba tesemtem nung agitsü metetdaksür.

- a) Mokokchung : Model Hr.Sec. School
- b) Kohima : KABA, Chandmari Fellowship S.S Hall
- c) Dimapur : East Dimapur Ao Baptist Church, SS Hall

Temetetsü kar:

- a) Admit Card Mokokchung nung agütsüsupur Chiteni 4&5, 2023 anogo nung office mapang nung angutsü.
- b) Kohima aser Dimapur nung agütsüsupurtem tatidang agitsüba anepdang 9:00-9:30 ako tsungda Admit Card angutsü.
- c) Anogo shia tatidang mapang anepdang 10:00 am-1:00 pm tashi alitsü.

Sd/-
(Prof. Rev. Rongsen Longkumer)
Convenor ASLB/AC

Sd/-
(I. Temjen Tzudir)
Secretary ASLB/AC

LAND for SALE

Location : Aoyimkum Village, Dimapur.
Size : 120/48 ft. Price : Rs. 8 Lakhs.
CONTACT : 9612843029

Kenya gari lendong nung asür nisung 52 jungogo

Nairobi, Chiteni/July 02 (Agencies): Kenya anüolen tsütsü gari lendong ajuruba nung Honibarnü tashinung asür nisung 52 jungogo, kong ketdangsur temi iba lendong atalokba tesem mürekba mapang lir.

Iba gari lendong ya Kenya nung tesashitiba rongnung ka lir, kong shipping container bona aliba gari ka Hokulbar nikongdang kanga mazüngi aliba lemjem ka nung lenmang tezülени mazüokteti ao aser anasa aliba gari aser nisung dak makepoka liasü.

"Nisung asem mozü kidang asüba sülen iba lendong nung asür nisung 52 jungogo," ta yangji aliba police commander Geoffrey Mayek-i ashi.

Transport Minister Kipchumba Murkomen-i iba lendong atalokba tesem semdang aser bushisungdang tenzükogo ta osangbener dang ashi.

Kericho aser Nakuru jila tsungta highway nung iba lendong nung nisung 30 shi yiru, ta Mayek-i ashi.

"Nisung 30 kanga sashia yirua mozüki balalai bener ao. Yirur alirtem ya iba dang nungi timba alitsü akok saka tang tashinung 30 tejangja lir," ta Mayek-i ashi.

Video footage nung gari aika nensar, minibus tem kishi raksar aser motorbikes tem nepsaa tsüker yin karbo mesenteper liasü.

Container ya kilentzü aoba lenmang nung makepoka liasü

aser yangji tesem tuluka nung gari indang menden, süngjang-lijang, raksar aliba axel ka densema jana prokshia liasü aser Honibarnü nüburtem adenshia repranga liasü.

Iba lendong atalokba indang tenük kuli alir Peter Otieno-i ashiba agi, "Iba gari ya kanga kera aruya aliba ni angu. Ni paitoktsü merang aser pa dak matsük. Kü sülen alisangi ni langka kar aliner südi ta bilema ni ajatet aser idangji iba gari nung atsük. Trailer ya lenmang alema ao aser danga garitem nung atsük."

"Kü tenük agi nisung tasü mang 20 shi angu. Gari telung nunga nisung tasü mang tem liasü."

Iba lendong nung nisung asüba ya Kenya nung küm ishika tsungta gari lendong tesashitiba rongnung ka kumogo. Taoba küm Kenya linük tiyonglen bus ka apu alemer ayong ka nung tsüka nisung 34 asü.

"Kü molungjang raksaogo. Ibai Kericho nüburtem asoshi tammang tia lir. Asür kinungertem den asükuh lemsateper," ta Kericho governor Erick Mutai-i Facebook nung ashi.

"Londiani nung gari lendong nung asür kinungertem den külemi linüki mang ayimer. Tesasatsüka karbo lanurtem lir aser parnok dak teimla tulu liasü aser karbo anogoshi aayanga jajaritem liasü," ta Kenya Tir William Ruto-i tweet ka nung ashi.

France nung Honibar aonung nisung 700 dak tema puogo



July 2, 2023 : Paris tezülen Colombes nung longkak aitba sülen van ka rongdoker aliba alema nisung ka aodang tangokba noksa nung angur. France nung Nahel ta sür lanur ka dak police temi injang agi akhaba sülen makamait, mapa manguba aser tereprangtsü sentsü dak ajemdaker bensaa amshiba timtem ajurua housing project nung aliba lanurtem aser police tsunga mangatetep adoka longkak aitba agi linük anokshitsür.

Paris, Chiteni/July 2

(Agencies): France nung asangur chanu ka police-i tepsetba dak sendakba nung lanur longkak aiteritem aser police tem aonung pongububa maneni mangatetep adoka arudar aser Honibarnü aonung longkak aiteritemi gari ka nung mi senoker mayor ka ki amaktsü meranga liasü.

Tensa azüoktsü atema security aika yokba sülen Police-i Deobar anepdang tashi nung longkak aiter 700 dak tema puogo. Kümtem tsungda France nung tang mepetmesü tuluba adoker lir.

Asüsang Nahel M den asüpila sentong agiba sülen Honibarnü France kübok yimti balala nung police meyrejang aika yoka liasü.

Tir Emmanuel Macron-i Deobarnü nungi tenzüka Germany semdangtsü liasü ajisüaka tensa azüoktsü atema iba sentong thinenogo. 2018 küm "yellow vest" longkak aitba sentong ajanga France ajunga lemta kümdaktsüba sülen pa lenisüba kübok tang mepetmesü tuluba adoker lir.

"Security forces-i jenjang tapet agiba ajanga Honibar aonung tesungjemba süitemogo," ta, Interior Minister Gerald Darmanin-i Deobar anepdang tweet asü.

Ajisüaka Paris mayor-i ashiba agi, longkak aiteritemi Paris anüolentip nung aliba jila ka indang mayor ka ki dak gari ka tsükokja liasü.

Mayor Vincent Jeanbrun-i Twitter ajanga ashiba agi, longkak aiteritemi par kidang gari ka tsükoktsü aser iba sülen mi senokja liasü. "Kü kinungtsü aser tanur rongnung ka yirua liasü," ta pai ashi.

France kübok yimti tulutiba asem; Paris, Lyon aser Marseille nung specialised elite units, armoured vehicles aser helicopter tem densema police 45,000 shi longkak aiteritem azüoktsü asoshi yimtung yokogo.

Taoba aonung pezü dang nungi tesungjemba süaka Honibar central Paris nunga mepetmesü tera atalokogo aser iba den Marseille, Nice aser Strasbourg yimtitem nunga mangatetep adoka liasü.

Yimtitem rongnung Marseille nung mepetmesü tuluba ataloka liasü kong police temi tear gas khaloktsü aser yimti kübok tesem balala nung aonung menoa tashi lanur longkak aiteritem den raratepa liasü.

Social media nung Paris kübok Champs-Elysees Avenue nung adenshitsü atema ayongzükba sülen police-i iba tesem nung security akangshia liasü. Iba yimtung ya yimya agi alima penzürtemi sünga alir ajisüaka police temi sünga liasü.

Anogo pongu tashi longkak aitba sülen police temi linük ajunga nung nisung 719 puogo. Interior ministry-i ashiba agi Hokolbar aonung nisung 1,311 apu, koba Brestostibarnü nisung 857 apuba dang nung tajemba liasü.

Linük ajunga nung local ketdangsurtemi longkak maittsü, nikongtsütsü public transport service sota atatsü tetuyuba agütsü aser tesem kar nungbo aonung sangwa curfew benoka liasü.

Mepetmesü tenzükba sülen gari 2000 dak tema rongtoktsüogo aser police 200 dak tema yiruogo, ta Darmanin-i Honibarnü ashiba den police-i pua alirtem ya timba arishi küm 17 tain asangur chanutem lir.

Kasa mapang nung dokan, supermarket, restaurant aser bank branch 700 dak tema rakpoka ia rakzürakdemba den karbo tagitsü makai rongtoktsüogo, ta Finance Minister Bruno Le Maire-i ashi.

Mongolbarnü Paris kübok Nanterre nung traffic stop ka mapang police kati arishi küm 17 tain Nahel ya khaseta liasü.

Pa den asüpila sentong asoshi Nanterre indang grand mosque-i aitsü atema nisung noklang aika tarensena nokdaker liasü.

Nahel dak injang khaloktsüba video ka prokshiba sülen, sensaker aser temeyoktep kintem anema police temi tashiyim amshiba aser racism atema ashishia aruba jangrushidakja liasü.

Nahel ya taoba mapang traffic temzung ozüng sülen manidakba police temi mangaoka liasü aser pa ozüng alema rental car ka anishia liasü, ta Nanterre prosecutor-i Brestostibarnü ashi.

Yuki Bhambri-i mezüngbuba ATP Doubles Title benogo



Yuki Bhambri aser Lloyd Harris

Chiteni/July 2, 2023 (Agencies): Honibarnü South Africa nung partner Lloyd Harris den Mallorca Championships nung tebur tarep asaya akokba sülen Yuki Bhambri-i mezüngbuba ATP World Tour title ka benogo.

Indo-South African tarep yagi final asaya nung Dutch-Austrian tarep Robine Hasse aser Philipp Oswald na 6-3 6-4 agi koka liasü.

Arishi küm 30 tain India nung asayar yagi opposition asayar ana yongtsü nung ball züklokja forehand winner ka nung asaya koka liasü.

"Grass nung asayamung

akokba atema kanga pelar. Grass nung tarep asaya nung set ka nung danga tamakok mongui takok anguba angashidanga mali. Kija asaya nung kanga junga asayaba partner ka den asayaba ajanga teyari tulu agütsür," ta Bhambri-i ashi.

"Künati akoba tashi asayaogo aser takok nguogo. Künati asaya ka nungi asaya ka ta asayatsü meranga liasü. Imlar tarutsü nunga takok tajung angutsü," ta pai shisem.

Bhambri shiba world ranking nung jenjang 75buba nung lir pa iba asaya akokba sülen 58bubai atutsü. Pa

Mongolbarnü arishi küm 31 ajungtsü.

Bhambri yiruba ajanga kija asaya nung junga masayatetba sülen pai tarep asaya nung shilem agitsü atema telemtetba agia liasü.

Pa mapang timbaka külem India nung asayar Saketh Myneni den asaya aruogo. Tenati taküm Nonthaburi aser Girona nung Challenger titles benogo.

Tena iba asayamung nung külemi masaya kechiyong Myneni-i anisüngzüküna liasü, ta Bhambri-i ashiba den pa Wimbledon nung Myneni den asayatsü ta shisem.

Asian Games atema Indian boxing team sangdongogo

New Delhi, Chiteni/July 2 (Agencies): Hangzhou, China nungi September 23 nungi October 8 tashi asayatsü aliba 19buba Asian Games nung India team Shiva Thapa, Lovlina Borgohain aser Nikhat Zareen nungeri anir asayatsü.

World Championships bronze medal ka aser Asian Championships medal trok anguba sülen Shiva-i tang mezüngbuba Asian Games medal ka angutsü atema imla alitsü. Pa 63.5 kg category nung asayatsü.

Tokyo Olympics bronze medallist Lovlina-a iba asayamung nung 75kg category nung asayatsü. Lai tang tashi nung World Championships aser Asia nung medal asemsem koka lir.

Kasa mapang nung Nikhat shibai tawa otsü tasen ka

yanglua World Championships nung gold medal tanabuba nguogo, la 50kg category nung asayatsü. Lai tang tashi nung 2022 Commonwealth Games nunga gold medal ka ngua lir.

"Iba squad ya iba asayamung atema anibelem mesasai kanga meranga renemdar aser parnoki linük nemadangdaksütsü ta temulung lema bilemer. Boxing nung India-i kanga junga shilem agia arudar aser temaba jenjang nung züngoksemogo. Tawa World Championships nung India nung boxer temi kanga junga asayaogo aser kasaji Hangzhou nunga angutsü imlar," ta Boxing Federation of India (BFI) tir Ajay Singh-i sangdong ka ajanga metetdaksü.

Iba asayamung nung Deepak Bhoria 51kg Flyweight category nung asayatsü. Arishi küm 25

tain asayar yagi tawa Tashkent nung Men's World Championships nung bronze medal ka nguogo.

Ano World Championships bronze medallist, Nishant Deva 71 kg category nung asayaba angutsü.

Iba asayamung ya 2024 Paris Olympics atema qualifier ka asütsü aser India nung asayartemi tajungtiba asayatsü imla atar.

Asian Games atema India team: **Tebur:** Deepak (51 Kg), Sachin (57 Kg), Shiva Thapa (63.5 Kg), Nishant Dev (71 Kg), Lakshya Chahar (80 Kg), Sanjeet (92 Kg) and Narendra (+92 Kg).

Tetsür: Nikhat Zareen (50 Kg), Preeti (54 Kg), Parveen (57 Kg), Jaismine (60 Kg), Arundhati Choudhary (66 Kg), Lovlina Borgohain (75 Kg).

Chennaiyin FC Defenders Ankit & Bijay na alizük

Chiteni/July 2, 2023 (Agencies): Indian Super League season tasenba metenzük tsüngda defence akangshitsü atema Chennaiyin FC-i defender Ankit Mukherjee aser Bijay Chhetri na alizükogo. Tena den küm ishika atema tenangzüktepba yangluogo.

Mukherjee, shiba right back asayar pai ISL asaya 38 nung goal ka idaktsür lir aser pa tang East Bengal FC nungi CFC nung denogo.

Arishi küm 26 asayar yagi

asaya kanga junga asateta asayar aser pai defence nung tamendakdak akangshitsü asoshi tongtibang shilem ka agitsü imlar.

"ISL anaben tashi koker aliba team nung densemba atema ni kanga pelar. Chennai nung asaya kanga meimba fan tem lir aser ni Chennaiyin FC jersey semer parnok matsüngdang asayatsü asoshi yongya atar," ta Ankit Mukherjee-i ashi.

Kasa mapang nung Manipur nungi arishi küm 21 tain Bijay

Chhetri nem Chennaiyin FC-i ISL nung tongtibang contract ka agitsüo.

Centre back nung asayasang ya taoba mapang local club Chennai City FC nungi asaya liasü aser pai pa dak defence nung asayatsü sempet aliba aser kanga süngjema asayatetba sempet sayuogo.

"Ni Chennaiyin FC nung densemba atema kanga pelar aser club nem teyari agitsütsü asoshi yongya atar," ta Chhetri-i ashi.

Hockey India-i Senior Men's Team

Core Group shimteter asayar

Chiteni/July 2, 2023 (Agencies): Hockey India-i senior men's core group nung asayar 39 shimer National camp June 26 nungi asaya shilem agia arudagi. Iba camp ya Sports Authority of India (SAI) Centre, Bengaluru nung kadagi aser July 19 anogo nung iba asaya tembangtsü.

Camp tembangba sülen team Terrassa, Spain-i aotsü, kong parnok England, Netherlands aser Spain den 100th Anniversary Spanish Hockey Federation International Tournament nung asayatsü. Iba asayamung ya July 25 nungi 30 tashi asayatsü.

Linük pezü asayaba asayamung tembangba sülen August 3 nü nungi tenzüka Chennai nung Asian Champions Trophy asayatsü, kong India team Korea, Malaysia, Pakistan, Japan, aser China den tokteptsü.

"Onoki Belgium aser Netherlands nung FIH Men's Hockey Pro League 2022/2023 nung junga asayaogo aser taküm küm tatemlen asayamung tongtibang kar asayatsü lir asünung maneni junga asayaner," ta India indang chief coach Craig Fulton-i ashi.

"Camp ya lenla kar nung onok asayaba yimya

ajungketshitsü atema maongka tajung ka asütsü. Asian Champions Trophy Chennai 2023 August ita aser iba sülen Hangzhou, China nung Asian Games 2023 asayatsü lir asünung iba ya tongtibang camp ka lir," ta pai ashi.

India core group nung asayartem yamai alitsü:

Goalkeepers: Krishan Bahadur Pathak, PR Sreejesh, Suraj Karkera, Pawan Malik, Prashant Kumar Chauhan.

Defenders: Jarmanpreet Singh, Surender Kumar, Harmanpreet Singh, Varun Kumar, Amit Rohidas, Gurinder Singh, Jugraj Singh, Mandeep Mor, Nilam Sanjeep Xess, Sanjay, Yashdeep Siwach, Dipsan Tirkey, Manjeet.

Midfielders: Manpreet Singh, Hardik Singh, Vivek Sagar Prasad, Moirangthem Rabichandra Singh, Shamsher Singh, Nilakanta Sharma, Rajkumar Pal, Sumit, Akashdeep Singh, Gurjant Singh, Mohd Raheel Mouseen, Maninder Singh.

Forwards: S Karthi, Mandeep Singh, Lalit Kumar Upadhyay, Abhishek, Dilpreet Singh, Sukhjeet Singh, Simranjeet Singh, Shilanand Lakra, Pawan Rajbhar.

Fabregas asaya nungi anenba sangdongogo



Madrid, Chiteni/July 2 (Agencies): Taoba mapang Arsenal, Barcelona aser Chelsea nungi midfielder Cesc Fabregas-i Honibarnü pa arishi

küm 36buba nung football asaya nungi anenba sangdongogo. Paisa, pa asaya nungi anenli nungi coaching nung shilem agitsü ta shiogo.

Fabregas-i, Spain team nungi asayaba mapang 2010 World Cup aser European Championships ana, Chelsea nungi asayaba mapang Premier League title ana aser Barcelona nungi asayaba mapang La Liga kokogo.

"Kanga dang mepelar ajisüaka ni asaya nungi anentsü mapang tongogo," ta Fabregas-i social media nung zülutsü.

"Ni jangradema asayaogo aser kodanga mamatoktsü."

"Barca, Arsenal, Chelsea, Monaco aser Como nungi asayaba teti bilemtetsü. Ni

bilemba dang nungi alia tajangshi tajung aika ajangshio," ta pai ashi.

Pa Barcelona academy nungi career tenzük aser arishi küm 16 asüba mapang 2003 küm Arsenal-i ao. Pai Arsenal nungi asayaba mapang 2005 FA Cup akok aser iba sülen taruba season nung Champions League final nung Barcelona 2-1 agi makokba asaya nunga shilem agia liasü.

Pa 2011 küm Barcelona-i meyipa ao aser küm asem asayaba sülen Chelsea-i ao.

Fabregas-i 2019 küm Monaco toktsü aser taoba season Italy second tier nung Como nungi asaya liasü. Asaya nungi anenba sülen pa iba club reserve aser youth team tem den inyaktsü.

"Iba team yagi mezüng nungi kü mulung koktetogo aser kü career nung mapang tetemsü ka nung iba club nung denogo," ta pai ashi.

BILEMDANGANG

"Nükjidong tejangja melira lenmang aibelentsü."